

Prome CAO entre ImSan y ABV

Instituto Medico San Nicolas y ABV a logra un contrato colectivo hopi importante cual a encera entre otro ahustacion di dlanan di vakantie y tick-etnan pa cuminda. "Ta un logro tremendamente grandi pa ImSan" asina Sr. Joel Rajnherc director di ImSan a bisa resaltando e trabou conhunto pa firma e prome CAO entre ImSan, ABV y e trahadonan.

Segun Rajnherc no tabata un caminda facil pa yega na e acuerdo aki pero cu madurez y respet mutuo nan a mantene tur e palabracion pa yega na un acuerdo cu lo trece beneficio pa ambos partido. "Esaki ta e comienso di un caminda nobo" asina Rajnherc a señala.

E CAO aki ta encera un con-

tracto pa 2 aña y den e temporada cu ta bin ambos partido ta haya e oportunidad di coregi e parti di contracto cu mester algun tipo di cambio. "Nos ta bay haci tur esaki hunto pasobra nos tin un base di confianza cu ta hopi grandi y esey ta algo cu mi ta gradici tur e miembronan di ABV." Director di ImSan a bisa gradiciendo tambe tur empleado di ImSan pe confiansa cu nan a pone den e compania durante e ultimo añanan.

Di otro banda, mediador di Gobierno Sr. Anselmo Pontilius a felicita tur esunnan cu a haci e contracto colectivo aki posibel y a resalta e trabou di ImSan como un institucion importante pa Aruba. Sr. Pontilius a splica con e transparencia tabata algo hopi importante durante

henter e proceso di e acuerdo y a remarca cu dirigentenan di ABV a compronde desde e prome instante cu aunke nan por tin hopi demanda y deseo nos mester keda riba e realidad cu nos ta bibando. "Miembronan di parlamento a expresa sosten y ImSan ta inevitabel como institucion di nos pais y p'esey nan tin un tarea grandi pa percura pa no solamente nan ta haya e fondonan necesario pero tambe pa haya e sosten di e ciudadanonan cu ta haci uzo di nan servicio" asina Sr. Pontilius a declara.

Segun Sr. Pontilius, e contracto colectivo ta un documento cu ta encera diferente tipo di condicionnan laboral y pa e motibo ey ta hopi importante pa e trahadonan haya e guia, servicio y consejo mediante



Gerencia y sindicato cu a firma e acuerdo aki.

Pa directiva di ABV e contracto colectivo aki ta sumamente importante pa Instituto Medico San Nicolas y a comenta cu aunke e caminda pa yega na e acuerdo aki no tabata facil, no tabata imposibel tampoco. Asina presidente di sindicato ABV a indica gradiciendo tur e trahadonan di ImSan cu a duna tur e sosten necesario na e sindicato

pa nan representa nan durante henter e proceso di CAO. "Trahadonan tin su derecho pero tambe nan tin nan debernan pa cumpli cun'e" asina presidente di ABV, Sra. Gina Maduro a bisa destacando e hecho cu e contracto aki ta bin di ambos banda. "E ta un tremendo CAO y mi ta contento cu nos a logr'e den bon ambiente y cu no mester di welga ni desordo" el a señala. □